

Damas dils Desertina Bulls sin rang 5

La dumengia vargada han las damas dils Desertina Bulls giu la davosa runda da campinadi per questa sesiun. Ellas han giu igl emprem giug allas 09:00 a Schaffusa. Per quei motiv ein ellas serendidas gia la sonda suentermiezdi encunter Schaffusa per star sur notg. La sera han ellas passentau a Schaffusa ina biala sera da cumpignia cun ir a tscheina communabel e suenter cun dar ina partida bowling.

L'uter di spitgava igl adversari da Heiden sill'equippa sursilvana. Heiden sesanfla sil 9avel plaz ella tabella ed aschia era ei clar che quei duess dar ina clara caussa pils Bulls. Las empremas diesch minutas ha denton igl adversari giu dapli dil giug. Heiden ei vegniu tier ina ni l'otra buna caschun dad ir en avantatg. *Livia Cadruvi* che dat siu davos giug en gol tiels Bulls, ha denton buca acceptau che Heiden sietti igl emprem gol. Silsuenter han las damas dalla Surselva alzau il tempo e fatg enorm squetsch. Aschia ein ellas vegnidadas tier massa buns siets sin gol. Il goli da Heiden ha denton tenuu schuber siu gol las empremas vegn minutas.

Desertina Bulls – Heiden 1:0

Suenter pausa ei il giug staus vinavon enta maun dils Desertina Bulls. Ils Bulls sittavan e creavan schanzas mintga minuta. La balla leva denton buc ir da gol en. Il goli da Heiden teneva tut quei che vegneva sin gol e sche lez teneva inaga buc in siet vegneva el bloccaus dad ina giugadura ni che la petga dil gol evitava igl emprem gol pils Desertina Bulls. Las giuvnas dalla Romontschia capevan buc il mund daco che la balla vegli buc ir finalmein da gol en suenter tontas schanzas e siets sin gol. Per alzar il tempo e survegnir in meglier ritmus han ils dus trenaders priu tschun minutas avon la fin in time out e midau entuorn sin dus blocs. Entras quei ei il giug aunc inagada vegnius pli sperts dalla vart dils Bulls. Duas minutas avon la fin vegn *Estella Mazzetta* d'impedir ina cunterattaca da Heiden, lantschescha cun in liung pass anavon *Gada Cathomas*, lezza dat in bi pass sin *Annalea Candinas* che sietta in ferm siet egl anghel dretg e fa finalmein igl emprem e bein maritau gol per las Sursilvanas.

Desertina Bulls – Winterthur 1:1

Il secund giug spitgava aunc inaga in adversari ch'era davos ils Bulls ella tabella. Ellas ein oriundas da Winterthur. Igl entir giug ei staus fetg malruasseivels e cun massa sbagls sin omisduas varts. Ella 12avla minuta sietta *Ramona Venzin* che porta per la davosa ga las colurs dils Bulls, igl 1:0 sin pass d'*Alexandra Flepp*. Il giug vegn pli e pli hectics. Winterthur vegn da profitar da massa sbagls dils Bulls. Mo las Sursilvanas laian tier negins gols tochen pausa.

Las davosas vegn minutas ein stadas fetg cumbattidas sin omisduas varts. Il giug ei vegnius pli agressiv ed entras in sbagl dallas giuvnas da Mustér ei Winterthur vegnius d'egalisar sin 1:1. Ils Bulls han naven da lu piars il fil ed ein buca pli vegnidadas bein el giug. Ei ha adina puspei dau ina ni l'otra bun'acziun per omisduas equipas. Cun grondiusas paradadas sur igl entir giug ora ha il goli *Ursina Venzin* spindrau dils Bulls in punct.

Cun quels treis puncts fa la giuvna equipa da Mustér in segl sil 5avel plaz ella tabella. Ellas han recaltgau 16 puncts questa sesiun, quei ch'ei ina fetg buna prestaziun per l'emprema sesiun cun quella giuvna, motivada e talentada equipa.

Pliras giugaduras calan

Deplorablamein sto l'equippa dar adia a pliras giugaduras. Ursina Venzin, *Aurelia Giger*, *Ramona Venzin*, *Livia Cadruvi*, *Andrina Cathomen*, *Jessica Spescha* e *Sabrina Venzin* bandunan ils Desertina Bulls. Engraziel fetg a vus per tut il prestau. Vus vegnis a muncar all'entira equipa.

Desertina Bulls cun: Aurelia Giger, Livia Cadruvi, Ursina Venzin, Ramona Venzin, Silvan Giger, Estella Mazzetta, Fabiana Bearth, Noemi Zanin, Selina Giger, Corina Venzin, Annalea Candinas, Noah Giger, Alexandra Flepp, Anica Seiler, Gada Cathomas, Tamara Derungs, Milena Derungs, Anna Quinter e Chanel Monn.

Silvan Giger